



Н. Құлжанова бюсті ашылды

Қазақ қыздары арасынан алғаш шыққан журналист, ұстаз, аудармашы, этнограф Нәзіпа Сегізбайқызының туғанына биыл 135 жыл толып отыр.

Нәзіпа Құлжанова апамыздың есімін мәңгі есте қалдыру жолындағы тағы бір шара ол кісінің мүсінін орнатумен көрініс тапты. Салтанатты шараға қала әкімінің орынбасары Түбекбай ӘУБӘКІРОВ қатысып, елі үшін аянбай еңбек еткен аяулы жанның есімі ұлықталғаны құптарлық іс екенін айтты. «Бүгін біз Алаш қозғалысы кезінде айрықша көзге түскен, аумалы - төкпелі заманда ел қамы үшін күрескен қайраткерлердің бірі - ұстаз, этнограф, аудармашы, журналист Нәзіпа Құлжанованың қаламыздан жаңалықты бой көтерген мүсінінің ашылу салтанатына қатысып тұрмыз. Нәзіпа Сегізбайқызының киелі Торғай жерінде туып - өскен, жерлесіміз екені біз үшін зор мақтанш. Бүгінде ұлы тұлғаның есімін иеленген білім ордасы жыл сайын жүзде-

ген шәкірт тәрбиелеп, еліміздің гүлденуіне зор үлесін қосып келеді. Ұлы тұлғалардың өмірі мен артында қалған мол мұрасы өскелең жас ұрпаққа үлгі - өнеге. Оларды ардақтап, құрмет тұту - біздің парызымыз. Қаламыздағы ескерткіштер шоғырына тағы бір аяулы ел перзентінің мүсіні қосылды. Қайырлы, құтты болсын, ағайын!», - деп атап өтті Түбекбай ҒАПСАЛЫҚҰЛЫ.

Мүсін Нәзіпа Құлжанова атындағы колледж жатақханасының алдына қойылды. Бюстті Арқалық қаласының құрметті азаматы Қайырдан ЖИЕНБАЕВ ағамыз пен Нәзіпа апамыздың немере сіндісі Болтай МҰРАТҚАЛИҚЫЗЫ салтанатты түрде ашты. Жиылғандар апамыздың рухына тағзым етіп, мүсініне гүл шоқтарын қойды.

Бюст мемлекеттік әлеуметтік тапсырыс аясында жасалғанын айта кетейік. Жобаны жүзеге асырушы «Жасампаз - жастар ұйымы» ҚБ.

Нәзіпа Құлжанова - қазақ қыздарынан шыққан тұңғыш журналист. Ол өз заманында: «Еңбекші қазақ», «Қызыл Қазақстан» газеттері мен «Әйел теңдігі» журналдарында жауапты қызметтер атқарған. Қаламы

қарымды қаламгер, ұлағатты ұстаз халқының болашағы үшін жан аямай еңбек етіп: «Айқап», «Қазақ», «Сарыарқа», «Алаш», «Бірлік туы» газеттерінде әйел теңдігі және оқу-ағарту мәселелері туралы көптеген мақалалар жариялады. Ұзақ жыл оқытушы болып қызмет жасап, қазақ мектептері үшін оқулықтар жазып шағарды. Оның айғағы: «Мектептен бұрынғы тәрбие», «Ана мен бала тәрбиесі» атты әдістемелік кітаптары. Сондай - ақ, қазақ әндерінің нотаға түсуіне де зор көмек көрсетіп, За-таевичке бірнеше әндер жаздырған.

Құлжановтардың өмірін, шығармашылығын, мемлекеттік және қоғамдық деңгейде атқарған қызметтерін лайықты зерделеп, бірнеше мақалалар жазып насихаттаған аға буын өкілдерінің бірі - Арқалық қаласының тұрғыны, Ұлы Отан соғысының ардагері, марқұм Мұратқали Камалов ақсақал еді. Осы кісінің тоқтаусыз ізденісінің арқасында қазіргі Арқалық педагогикалық колледжіне Нәзіпа Құлжанованың есімі берілді. Жылында осы мәліметтер айтылды.